



### **Futura destinaziun turistica pel Cumün da Zernez**

La commercialisaziun turistica pel Cumün da Zernez vain unifichada süls 1. schner 2019. Pel mumaint sun Brail e Zernez part da la destinaziun turistica Engadin St. Moritz AG (ESTM) invezza cha Susch e Lavin sun part da la destinaziun turistica Engadin Scuol Samnaun Val Müstair AG (TESSVM). Las differentas variantas sun gnüdas trattadas illa direcziun operativa sco eir illa suprastanza cumünala. La sairada d'infuormaziun per la populaziun ha gnü lö als 21 favrer 2018. A la radunanza cumünala dals 25 avrigl 2018 vain decis sur dal futur turistic dal cumün fusiunà.

### **Sanaziun ed ingrondimaint chasa da scoula a Zernez**

Per prochatschar il proget da la sanaziun ed ingrondimaint da la chasa da scoula a Zernez ha la suprastanza surdat l'incumbenza a la "cumischiun chasa da scoula" da proseguir culla varianta da sanar la chasa da scoula cun fabricar ün annex. La mità da marz 2018 ha lö üna sairada d'infuormaziun per la populaziun. La dumonda da credit d'investiziun vain preschantada a la radunanza cumünala dals 25 avrigl 2018.

### **Proseguimaint proget Zernez Energia 2020**

Il proget Zernez Energia 2020 es gnü inizià in occasiun da l'anniversari da 100 ons Parc Naziunal Svizzer. In december 2017 ha gnü lö üna sezzüda cumünai vltanter la cumischiun Zernez Energia 2020 e la suprastanza cumünala cul böt d'orientar ils preschaints sur da l'avegnir ed il svilup dal proget. Il proget ha ragiunt ils ultims ons ün renom naziunal, sco eir internaziunal. In avegnir as vuol far gnir plü preschaint il proget Zernez Energia 2020 i'l Cumün da Zernez, saja quai in fuorma d'occurrènz cumünalas sco eir cun premis o labels per üna plüvalur turistica o eir economica.

### **Ruzön III a Zernez – surdatta da lavurs da catram**

La suprastanza cumünala ha surdat las lavurs da catram a l'impraisa da fabrica Hew AG a Zernez. Las lavurs sun previsas da manar tras da prümvaira 2018.

### **Viafier Retica – nouva staziun a Saglians – exposiziun publica dals plans**

Las actas da la Viafier Retica d'eiran expostas public per l'invista dal cumanzamaint schner fin principi favrer 2018. La suprastanza cumünala ha tut posiziun in sen positiv e nun ha gnü da far ingünas intervenziuns.

### **Bogn da famiglia – rimplazzamaint igluminaziun in LED – seguonda surdatta d'incumbenza**

L'igluminaziun i'l Bogn da famiglia vegn rimplazzada in LED. La fin d'avuost 2017 es la procedura da submissiun gnüda ruotta giò per adattar ed agiundscher la procedura da submissiun. In schner 2018 ha gnü lö la seguonda submissiun. Las lavurs pel rimplazzamaint da l'igluminaziun cun glüms da LED es gnüda surdatta a la firma Electra Buin SA a Zernez. Quist rimplazzamaint vain sustgnü dal chantun Grischun cun üna contribuziun finanziaria.

### **EW Zernez - fibr'optica Zernez - decisiun da princip da proget**

Per pudair proseguir cullas colliaziuns principalas dal provedimaint grob da fibr'optica a Zernez vegnan in ün prüm pass installadas las componentas passivas ed activas illa centrala da fibr'optica in Cul a Zernez. In üna sezzüda tanter l'EW Zernez, il planisader specialisà dal büro Brüniger a Cuaira ed ils respunsabels da l'EE-Energia Engiadina a Scuol, s'ha discutà sur dal proseguimaint da tuot il proget da fibr'optica. La suprastanza cumünala ha trattà ed approvà l'inizi dal proget.

### **Infuormaziun da la Swissgrid a regard l'indemisaziun per covrir ils cuosts da la furniziun d'electricità (ICF)**

La Swissgrid AG ha comunicà in december 2017 sur dal stadi da la probabilità da sustegn da progets tras l'indemisaziun per covrir ils cuosts da la furniziun d'electricità (ICF) da la Confederaziun, davo il müdamaint da la legislaziun süls 1. schner 2018. I's tratta da set progets d'ouvras electricas tanter oter eir da quellas cun aua dabaiver ed ün'ouvra fotovoltaica. La suprastanza ha trattà mincha singul proget ed ha sancziunà oter co l'ouvra fotovoltaica Laret a Lavin da mantegner la pussibilità da survgnir las contribuziuns dal ICF.

### **Statistica sezzüdas, radunanzas e votaziuns 2017**

Il chanzlist ha orientà a la suprastanza sur da la quantità da sezzüdas e tractandas da l'on 2017. La direcziun operativa ha trattà 540 tractandas in 27 sezzüdas, percenter ha la suprastanza cumünala trattà 251 affars in 19 sezzüdas. In trais radunanzas cumünalas han votantas e votants decis sur da 19 tractandas. Dürant l'on 2017 haja dat üna votaziun a l'urna.